

國朝畿輔詩傳

國朝畿輔詩傳卷五十七

長洲陶

樸澆薌輯

甘泉汪喜孫孟慈校

李雲章

雲章字子文號壽君大興人惟寅子嘉慶二十三年舉人官撫寧縣教諭有咫聞齋詩集

朱錦序嘗聞王老圃稱子文詩才清俊迥出恒流愛而不見于今十年昨以舊草見示挑鐙諷誦灑然不倦竊

喜故人有後

葉紹桂序翼翼獨造力掃陳言骨韻俱清意在力追古人不拘一格

葉紹本序古體雄深雅健嗣響三唐律句整練高華肩隨七子洵詩壇射鵰手也

大人自養利州書示官况敬述

養利古羈縻道遠山險熾農民供力役肩舁不敢辭昨  
迎長官來輿轎三僕隨笥中半書卷雜置寒暑衣此官  
一何貧胥隸竊笑之父老通殷勤再拜前致詞官有母  
妻子何不同來斯邕州數百里何緣久分離官非願分  
離惜爾民力疲絳標徵鄉夫擾攘驚犬雞舉手謝父老  
努力方農時

亂山擁孤城木石半於屋州衙曠無堵圍以篋笏竹四  
面鬱蔥蔥烟籠萬竿玉客無王子猷清風媚幽獨玲瓏  
見街巷人影動深綠官民同一家壅蔽患耳目毋爲此  
君笑豁然披心腹野獸時來游可窺不可觸忘機久還

馴勁箭罷驅逐垂涎爾何冀官庖無餘肉終歲飽竹萌  
誰言作吏俗

馬峽

峽形如萬馬騰蹴互相狎夾水立堅陣驚濤怒歎飲中  
天日車避太古雲氣疊萬阻得一門侵昏走艘牒習險  
不覺險把酒觀羣峰羣峰亦無賴亂臥酒杯中舉杯咽  
聲翠邱壑入我胸醉化栩栩蝶似御泠泠風翳然山水  
眉不放吟魂去夢遊鬱繼天孰引虛無路晨聲來遠瀨  
霽色散雲霧笑出萬馬圍蒼茫不知處

平樂以北山石奇秀盡所莫及聊短述之

看山不逢奇未若讀奇畫丹青宋元手意匠逞瓌怪頗  
凝頑石頑凝峙無此態竭來陽朔道驚喜向山拜始憐  
畫師庸皴染殊未逮天地工結撰迴出思議外江聲百  
折下石骨兩壁對削成面穹碑巉絕根激瀨嵌空神瑯  
鏤文理古繡繪草樹點金碧烟嵐渲鉛黛上有猿狖羣  
垂藤裊相挂幽鳥不見影虛巖遞清籟離離千百峰物  
象鳳麟萃正如秋夏雲萬變縱狡獪微生走湘楚拳勺  
嬰痼愛種苔羅書牀自詫雲夢芥豈知造物豪奇石此  
都會山好不在高詩好不惋碎拔戟能自雄尋初亦華  
泰傲睨驂鸞仙舊錄補成大

自桂林赴永寧州有作

桂林西百里山勢塞天綠一徑飛鳥外盤蛇斷復續我  
身託篋輿愧彼行躑躅仰陟牽長絙俯注挽羣僕危躋  
頓層峭旁涉眩屢曲崖頽石壓頂磴削苔滑足冥濛走  
腥雲慘澹入幽竹舞風高樹飛弔月怪禽哭都郎嶺尤  
險千仞擘坤軸灝氣反在底那能辨巖谷三臺抱重巘  
堅壁儼單複虎豹昔縱橫兵戈費驅逐明隆慶中俞大猷平土民韋銀  
此豹於我來屬時和山深暑不酷掇芳闕仙賞挾勝豁塵  
囑朝炊霞際餐夜枕水聲宿扶持忘疲勞山川喜淳樸  
便作桃源看端居領清福

烏龍巖

神龍不騰霄戀此巖壑美重岡掩幽邃去郭纔數里仄  
徑緣巇嶇攀蘿上尋尺紺宮嵌虛崖濃綠抱窗几炎暑  
到門盡禪房氣如水風從山頂來吹落高松子老僧寒  
酬答趺坐苔壁倚游神出冥漠視客等糠粃唯有蟬鳥  
聲時時聒人耳巖前碧潭淨倒影山翠洗抱珠睡何慵  
投石下無底秋山望甘澤我欲鞭龍起

竹鳥山

蟻道出羣峭石梁天際橫亘如劍鋒臥人在鋒上行容  
足一綫苔過雲千步程山風颯然吹欲舉鴻毛輕斜陽

照笠屐影落前溪清溪邊莫王廟小憩披榛荆荒碑久  
磨滅但見神狎狎猶有寶祐鐘鑄自清湘岷炎國失筭  
虞瘖絕蒲牢聲傳聞此山北鳳皇昔來鳴竹實豈足飽  
凡鳥難爲朋赤霄諒不遠去和簫韶成

王文成公講學堂

崇祠肅幽深重閣交密樹下馬神志斂猶疑節麾駐山  
蹊塞苔草水檻貼鷗鷺不見登臺人空餘舊臺柱陽明  
昔平蠻邊郡數朝暮飛檄靖塵氛當軒理毫素田岑異  
三泖滕峽開一路經國存遠猷藩籬至今固良知本鄒  
孟希聖非異趣門戶蚍蜉多末流自烟霧世無勒銘才



國朝詩集卷五十一  
標此講學處蠻夷詎知學俎豆感霜露升堂拜公像安  
得黃金鑄楚蜀方用兵低徊起遐慕

溪上

衡山日將沈選樹禽未靜偶攜綠綺行清流寫我影松  
際何人來一笠帶雲冷

農事

屋角春鳩鳴農事須及早山城幾日雨新秧綠于艸臺  
笠散朝陽歌聲向風裊鱗鱗水田波兩兩白翼矯烟光  
鬱葱翠媚此邨人老欣然念游客倚樹談溫飽笑問烏  
犂牛何如紫騮好

舟夜

暮氣澄秋湘涼馨度芳蒨中夜客心定孤篷露光洗薄  
雲猶在天緘月忽墮水葦鏜散明滅莎蛩訴悲喜遙山  
暝如睡碧影空濛裏化作數痕烟峭風吹不起

龍隱洞

七星自矜奇撲亞踞江北對面湧一峰氣乃與之敵竦  
突不列行肅若主揖客又如傑士身近人亦孤特徑闢  
虛邏背烟披紫翠色上峭鑲圓蒼下厖吮健碧神物蟄  
來久破山飛霹靂訝開雲庭扃仙佛莫敢宅抱勝難自  
閒萬手畫丹墨石骨不受苔夜聚古魂魄岌岌元祐字

深文鑿國脈黨人非盡賢緝綴被貞勒乃知附君子受  
禍計亦得至今畸士心恨不入此籍洞門敞高濤坐見  
遠城驛江急長風生日落衆木赤呼艇泛暝陰人語散  
蘆荻山靈不我留浩歌慰蕭寂

灘江看山

戛戛闢天改狺狺碎坤軸思議莫能到那辨繹與蜀不  
知渾沌始蠻石誰手剗翻疑造物巧師此創萬族昔賢  
詫奇絕我行數往復譬獲古冢書不解亦貪讀臥游短  
篷底夢壓一船綠灘水激箭來堅壁兩夾束蛟鼉疾騰  
逃坐讓衆山浴峰峰勇奔赴後者幾欲蹴瘴雲倏歎飲

百怪孕其腹自結蒼翠嵐蜺盡春草木頭角羞雷同作  
態門妝沐勢各不相下潒繆駭麗矚因思文人心鏤鏤  
萬卷牘有才必獨造抵死避庸熟岱華立宇宙李杜韓  
鼎足此爲窮孟郊骨挺無寸肉意外撰幽豔仙鬼或昌  
谷庸峭得真冷一洗金碧俗毋乃騷楚魂棲此洞天福  
我欲圖之歸徧質羣岳瀆懸厓鐫硬筆留醒萬古目

題羅星橋畫桂林山水

烟嵐結縹緲樓閣勢欲飛仲遠驅豕去海龕虛翠微松  
陰獨鶴語日落僧未歸

劉仙巖

臥石繡苔衣飛泉走雲縫紅闌空際折遠目鴻邊送一

嘯長風生羣山洶欲動

疊翠山有風洞

數紅復拍翠翹立青天高羣峭不敢向五更風怒號飛

仙拔宅去鸞鳳皆吾曹

門辨山

石氣曠蕭散飛雲帶烟樹和風爲誰來一葉落琴處北

望湘波深嬌雲愁不渡

南薰亭

跳岑崢絳霄森列杓魁星一竅通九疑仙窟開幽局然

犀下無底天地皆純青

七星巖

壺公愛石隱醉買千林春春心一歎飲炎豔烘嶙峋我

無餐霞方欲問蓬萊津

壺山多桃花

和邵蕙西食白菜用蘇集雨後行菜原韻見投之

作

天驥騰蘭筋駑駘齒空長舳艫帆長風烟艇滯篙槩區  
區草木性亦別墳壚壤邵君江南來行止恒山仰垂雲  
鰲鵬術捧日佇霞想顧我如爰居猥用鐘鼓饗披光已  
傾抱挹蘊方留賞徐徐味其醇衰聰豁秋響翠色橫連  
眉爽氣攬盈掌聆君鏗爾撰餒我浩然養

君家西子湖湖上莼絲長采莼潔晨膳飽聽伊啞漿  
波謁春卿訪古陶唐壤俊風暗塵沙看雲目空仰俯窺  
呼漁流時作濠濮想一枝棲可借二簋烹以饗詎知筍  
奴賤輒共侯鯖賞領異快新饜探喉戛清響味淡心自

怡有類熊舐掌白華寓鄉懷吾以觀所養

我本幽并兒生於桂林長氐氐習南食夢狎江上樂赤  
霄雛鳳飢啄粟墮邊壤歸來無寸田著書屋空仰五鼎  
與萬羊溢分非夙想孕頤鱸膾秋覩面豬肝饗幸能咬  
菜根一飽天所賞空齟玉脂膩溼竈松濤響弄孫飴同  
含呼兒杯覆掌坎離鍊黃芽仙餌問都養

古詩奉和元氏教諭夢塘劉丈

丈人京國彥官小才獨大樂閒守一職名滿燕趙界不  
誇樹人功但積詩酒債牢落千秋心欲出天地外手剔  
白石碑窮厓耀金薤高歌樂府曲宮商和秋籟頽然入

廣座猶使衆形穢昨枉谷口駕憐此庭下拜示我五字  
篇春空雲靄靄深知意獎借獨惜舊情話先公昔同升  
投契攬環珮我曾祖我祖忘年遞酬對龐馬無主賓披  
豁古肝肺風雨倏合離江河分遠派音塵一以隔歲月  
去無奈賤子客常山邂逅已心快安知憂患餘下見豚  
犬輩滄桑百年半瞥眼歷五代俯仰問陳蹟老淚爲一  
慨詩人自多情繼繼斯焉最通家徵孔李盛事稀記載  
所愧紹述身歧途久顛沛遺經幕下授苦語篋中碎蟲  
號與黻音那辱屋烏愛丈人篇什富名山仰蒿岱有如  
井陘將旗鼓領一隊松柏千尺姿蓬蒿難爲態敢信泥



中菱流澤尙永賴勉從丈人游詞源沂津逮歲暮瘡初  
起晴窗緩裘帶禿穎寒不凍大宅陽氣藹緘詞報瓊琚  
何時雞黍會

恒山講舍雜詠示諸弟子

碑楹

楹間對立兩碑乾隆中某太守及邑人所製

納楹無遺書屹然存兩碑空階影突兀仿像山中祠興  
廢本豪舉紀成兼去思鐫華示千秋不惜瓊琚辭青石  
誰共語白鹿迷前覲峴山終磨滅嗟爾雙盤螭

端正槐

堂下兩槐左右疎時有正直矜肅之容

當庭列嘉樹修幹齊雲端童童雨華蓋不作蛟龍蟠忽

如輔弼臣王色立朝班日陰結煙靄風葉鳴琅玕吾徒  
爲花忙訪業來盤桓植身果從繩百獲才非難

交柯榆

院東南角巨榆與槐相抱而生

孤榆不自拔勢借槐身巧共稟天上星纏綿此懷抱玉  
樹交枝柯青錢綴其杪雖非同根生亦得相依老橘柚  
合兄弟霜雪均榮槁三歎求友篇長松施蘿蔦

老樗

窗下一樗高出羣木夏雨流根則芝菌茁焉

生非梁棟材敢據門庭地投閒衆木表特立千尋勢與  
椿同歲年豈必差臭味小院人不到涼陰一窗芭潤蒸  
芝菌黃濃奪榆柳翠無用亦無苦兆我文字瑞

石牀

昔之碑材磨而未楔皮諸庭右代彼胡牀

補天有遺材來自封龍頂  
橢然一片雲坐我槐影靜  
幸脫文字厄圭棱尙修整  
晴曝書宜攤醉眠酒應醒  
風花隨帚稀露簾迎秋冷  
詩禪夜入定月照盤陀影

方井

院中方池深廣踰丈不能鍾水胥然葉井而已

誰留此缺陷掘井不及泉  
得無寓微意惡溼兼惡圓  
黃葉鋪作底陰苔凝古軋  
跳蛙方隅目未識團團天  
堂坳瀉積潦石縫鳴么絃  
寄言冥行客平地險在前

小蕉林

方井之北芭蕉二本攢莖布影異秀延矚以移自梁氏蕉林故小之

不逢蕉林盛但見蕉心老  
前朝雨露餘北地園亭少  
分

來半天綠葉大莖柔嫋聽雨幽夢涼扇風碧紗曉窗防  
修竹彈狂學醉惜草相業易儒林清名莫嫌小

練塘

舍北積水夾水人家擣衣之聲晨暮相繼

屋後喧笑語杵聲亂鳴蛙夕陽動虛碧水底生雲霞涵  
秋一匳月照影干枝花曲岸小紅樓美人何處家客心  
託微波不染萍沱沙振觸遠游夢越溪天一涯

鴨徑

後院小門以通樵汲遂畜羣鴨放于練塘

一徑入深草荆扉臨水開水邊人蹟稀日日羣鷗來我  
有一闌鴨獠奴爲之媒相呼似解語自去還自回幸無  
比鄰惱踏破門前苔雲路爾何羨卑行守蒿萊

半橋

爾

牆外小渠瀉水，石爲橋，非梁，非虹，得半云。

地僻如山村，水聲時到門。  
橫牆數片石，野色青青分。  
迴環車馬蹟，刻露泥沙痕。  
疎柳帶紅牆，孤筇度黃昏。  
題柱非我思，濟人非我恩。  
清流無捷徑，示爾周行遵。

甲午五月端兒奉

命充雲南鄉試正考官

道出真定，爲留一宿，作詩四章以勗其行。

聖代重選士，封軺馳八方。  
自非鴻博儒，何以揚國光。  
臣端忝詞曹，罔維伯池鷁。  
猥叨第一命，典試滇

南鄉。嶺南古蠻徼，益部開華陽。  
磅礴金碧氣，發舒英俊俊。  
翔兩星天北，來百寶騰精芒。  
汝端幸得朋，並駕浮漢汪。

副使上 塵目毋自眩蘭心有餘芳舉華擷其實努力

報我 皇

文藝浩煙海別流同一源九經逮衆史浸溢爲波瀾不  
讀萬卷書那代孔孟言宋儒闢理窟非以資兔園帖括  
庸腐詞貽誚徐凝村功令設三試學固求其全詎應薄  
董鄭唯尙歐蘇韓衡平在杪忽鑑明窮朝昏堂楣揭

聖訓謹作朱衣看莫以摘髭易忘彼登天難

我昔攜汝歸煙艇帆

去聲

楚粵南北一萬里江天坐超忽

及茲壯遠游乘傳出京闕滇池我未到夢剗山水窟五  
溪陟黔疆鳥道縈一髮旌興度雲表手攬山萬笏粲粲

儀真公

阮節相

文耀輝溟渤大儒位左相邊鎮仗金鉞汝

往從之游掣經窺日月愧我心仰高長川不可越

雙鵲噪叢竹兒童競歡呼使車過鎮府中道趨精廬登

堂相拜慶喜色充我間四年未見汝壯盛將有鬚爲我

半日留爲兒烹雞臯絮語不遑私勉哉宏遠謨承家篤

忠孝珍重受

恩初我健勿爲念眠餐慎長途贈

汝以自愛授之先正書歸來誦新詩臘酒娛老夫

以彭文勤

朱文正兩集賜之

### 韋石歌

是誰斧青冥割此西山瑤一峯屹立小窗下深翠猶帶

天池濤無窮變態出詭怪萬仞遠勢生纖掣爛如薜葡  
華敷潤舒春翹聳如夜叉臂突兀撐空霄矯如駿馬蹴  
堅陣婉如好女迴輕腰風潭隔戶老蛟攫雷雨入夜天  
吳號北平飛將膽亦讐納手不敢關弓弣伊昔鄺郭注  
異石硯礪礪碧兼礪礪茲峯形狀失載記神工運化非  
鐫雕我疑朱鳥配南極星芒下墮象嶺椒又疑媧皇鍊  
五色補餘閒置蠻雲砌天生奇物各有所肯使碌碌歸  
漁樵礪材或入洞庭樂銘功或勒銅柱標此獨完身享  
清福深居韋廬之綺寮公愛蘇州兼愛石焚香燕寢供  
爬搔我亦韓陵山下客灑翰不靳心賞邀相逢石兄合



再拜自慚猶未具笏袍

樹根虎歌和李太僕宗瀚

螭龍不護蠻雲根木母冷孕於菟魂頑仙斧碎二千尺  
飛盡劫灰無血痕想當叢莽翳崖谷幽偃窺夜啼枯神  
虎喘一聲衆山裂月黃箚黑雙鐙皆山靈攫石戲牛梓  
忽填礧礧僵璚玢寒樵膽驚不敢捫赭鞭驅入閭堂蹲  
魑魅騰逃草木僵狂飈獵獵掠霜口主人譚詩擅雕虎  
造次手攬何其馴威骨輪囷縮成癭蘚斑駁犖皴無文  
昂頭掉尾有餘怒其氣欲向人平吞亦如雄才坐頽朽  
爪牙脫盡猶精神不羨孫枝託鸞鳳肯教綵植褻麒麟

醉客來觀勇無畏  
勸刻硬句欺軒轅  
爾毋破檻思風雲  
騷壇亦有飛將軍

銅雀臺瓦硯歌

土花腥蝕雲楞小  
膩綠無聲磨古藻  
龍麝香分伎女愁  
鴛鴦影送英雄老  
淬妃文采建安初  
一片流傳認鄴都  
炎漢江山歎瓦解  
曹家宮闕高當塗  
天教銅雀凌風起  
莫問紇干凍禽死  
烽火朝摧赤壁兵  
旌人夜鑄清漳水  
鼎峙三臺負郭西  
金當稜稜封瑤泥  
延年不署飛鴻篆  
八斗還標繡虎題  
登臺作賦心閒雅  
建瓴勢欲并天下  
尺木方驚得水魚  
蕭牆未夢同槽馬  
千溝翠照日輝輝

飽聽軍聲振屋飛二喬不鎖銅仙泣轉眼霜華冷總帷  
砂礫沈甌陵谷變瓦全難保陳留奐金虎同銷故井冰  
石龍又築鏘天觀可憐歌吹望西風敗瓦頽垣啼翠紅  
七十二冢荒秋草祇合招魂出土中細匣何人寶蒼壁  
古色黝光生几席陶泓湯沐小金城羞比魏王榮九錫  
蟾蜍淚滴喻麋海點筆興亡二千載瓦缶如雷敢浪鳴  
當歌對酒還慷慨

渡江望金焦作歌

雲飛九霄下盤根蒼玉插破琉璃盆兼山滄水守天塹  
眼前忘有噴然坤鐵甕城東瓜步口星潮月汐蒸渾渾

地輪盡處表雙闕海若不敢窺離樊氓江萬里一直瀉  
到此勢欲迴狂奔金山恍自蜃口出丹甍翠栢堆無痕  
焦山骨立去人遠松篁秀絕關荆皴岸傍蒜山亦不羣  
若望後塵追季昆我乘一葉來黃昏排風鼓浪驕鼉鼉  
斜陽倒影兩浮翠洪濶百疊相吐吞江南江北望不極  
羣山如鶩趨天門安得竦身凌絕頂仙漿下酌郭璞墳  
烟霞高臥不知夜醉來手弄扶桑暎

龍女牧羊圖

慘碧悽紅鏡秋水雌龍生羨鴛鴦死酸飈吹淚漲清湮  
魚銜不到湘娥蒞霧鬢飛蓬眉蹙月孤花弔影風波窟

鬚奴踟躕愁向人似恐蘇卿老埋骨柳星秋渡霜葭湄  
啼烟訴月情依依半翦冰綃吐哀豔蝶魂暗送鴻賓歸  
珊鞭敲折璿精樹蜃閣鮫宮夜深處壓頂濤聲噴古悲  
蒼驪不睡螭蚪怒火雲燒天驅霹靂涇川沸湧元黃血  
一掌擎還碧海珠三年蝕透天山雪靡蕪漂斷香蘭笑  
羞拚嫁衣窺玉照偷向人間學報恩離鸞翻出求鷓鴣  
靈蟲巧締長生偶小劫紅羊怕回首君不見夢裏秦雲  
舊美人湖邊楚雨春楊柳

馬退山歌

奔馬一縱不可收渴吻直注長江流蛟龍怒起噴雪浪

懸厓驚躍回其頭或云房駟浴秋漢卓立銅骨神雕鏤  
坡仙硬語寫天目惜未訪古來邕州茲山勒足千里外  
尙見駿尾盤荒陬當時顧盼得二柳不使瘴土埋騅騶  
茅亭攬勝寄椽筆至今玉珮瓊琚留圖經陳蹟費探討  
背郭一徑山之幽羸蹄數息不敢進怪石犖确藤蚴蟉  
山腰壞廟指遺構信有詭狀盈我眸藩籬縈繞白雲護  
綺繡錯雜丹楓稠前插劍鉞萬笏嶺下瞰箭筈千帆舟  
浮圖九級冠截業危梯半上風颼颼有如尋撞跨馬背  
曠土登此翻百憂是日新涼雨初止金精快吐蠻天秋  
心逐遠影鴻滅沒坐忘返照江夷猶揮琴尙想昔人意

車言作 卷五十一  
臥治不礙逍遙游云何轅下多局促佳境寥落歸吾儔  
斷碑廢礎踏榛莽題字恐貽林澗羞斜陽策蹇試回望  
亂山騰踔烟嵐浮

大人自西隆歸有寶刀駿馬舊銅鼓命雲章各旌  
以詩

陌刀 刀長三尺柄二尺餘卽古斷馬劍

紅旗春徹西隆營剗珎襖關洗甲兵鐵衣捲雪馬足輕  
馬後劍戟紛撐撐陌刀五尺尤威靈聖鐵胚孕蒼龍精  
鰈胎裹鞘藤纏莖蜚廉鬣環影紫纓夜堂置酒爲客呈  
一客拔刀衆客驚刀欲出鞘先有聲殺氣撲面陰風腥

飛電入室鏗不明月魄冰骨懸寒清崩霜蝕血苔繡蘋  
去年冒瘴西南征青蛟露脊竄邊橫鷓鴣膏鏐新發硎  
神物得主鋒難撓入陣跳盪刀在手短兵直前弓矢後  
孟勞葛黨相左右翻雲掣日動兩肘一片寒光風抖擻  
十步以內人無首斷馬快如鏹斷韭帳前兇虜駢械杻  
肝脆腸肥飽刀口刀光射天毒龍吼攙槍倒落魑魅走  
雨黑江紅啼鬼母昆吾切玉非所偶報主承平勦羣醜  
亂臣賊子那得久以殺止殺天忠厚邊民佩犢歲其有  
座客銘功稱萬壽司馬寶刀傳不朽

豹花馬

駁毛赤斑大人開龍隘山夜涉深澗一躍而出



有賊八尺金錢文棱棱天骨開風雲房星晝落冉驪地  
來與司馬成功勲伏櫪循良臨陣喜不許敵人窺駿尾  
短轡縱橫戰鼓先完身出入烽烟裏龍隘山深突賊圍  
盤渦黑夜虬龍飛濤心一蹴起霹靂髮邊挂得骷髏歸  
絡月羈金龍無匹主人封侯定何日燕昭臺畔多芳草  
放爾昇平歸去老

銅鼓

前平安南時所得俗呼伏波鼓大人有詩辨之

公昔受降宅南交銅鼓掘出遷龍橋懸庭十年未敢擊  
援袍千里西征苗紅水江頭血戰苦瘴烟壓鼓瘡不驕  
銅鼓一聲衆聲應士氣益湧如風濤晴雷下天逐燁惑

山谷響震乾坤搖賊兵膽落掩耳竄萬馬立聽蠻鼙號  
公時撫民獨留後從容軍令新旌旄帳前撾鼓饗牛酒  
降酋聳噴猶驚逃歸來歡聲競笳角宴客雅奏排金饒  
摩挲衆手歎奇物而徑五尺三尺高古灰沁骨繡丹碧  
磨臍醜凸蟾蜍跳疑篆疑籀不可讀蛇龍糾結紋周遭  
俗書誤稱伏波製枝辭無據公所嘲得駱越鼓鑄銅馬  
豈聞范銅比鼗鼙蠻夷作樂供祭賽金銀大釵都老操  
有時鳴鼓聚謀亂今日戡亂歸賢豪鬱林佛刹伴龍象  
桂林節解陪蟬貂無用之寶等廢棄雄音咽塞何人敲  
此鼓雖微得所用千年古器寧鎔銷我欲提攜獻軍府

龍銅不數金花腰一鼓秦關埽餘孽再鼓荆楚清氛妖  
功成輦致太常部兩階千羽廣簫韶

留別南臺諸友

蒼西門外亭子渡尊酒時時送人處秋風樓櫓颭紅旌  
我亦順流東北去去來蹤蹟小斜川兩度邕州住九年  
官清未覺蠻鄉陋客久難忘地主賢將軍賓館開金戟  
內史書堂分半席先讀書鎮署後移王氏寓成就文章尺寸功尙留  
烟墨龍蛇壁宦海飄帆倘復來飛鴻印雪重徘徊手圖  
山色奚囊貯淚灑荆花瘴土埋殷勤舊雨來相祖並舫  
移尊載歌舞江上猶聯半日歡醉中已過平塘浦平塘

落日水深深千尺桃花共此心今宵攜手看明月他日  
相思在桂林

仙影石歌

碧石黝文作老人騎驢狀意態生動如畫表叔徐侍衛得之或曰張果影也

鑿開渾沌飛蝙蝠幻作老翁顏似玉拍板高歌山海青  
驅蹄蹋碎空中星游戲醉鄉遲蹇步蓬萊忘指虛無路  
小臥雲根最幽處一朵頑雲抱仙住吹盡劫灰留兩魂  
陰陽鍛鍊烟霞紋神龍入蟄無蛻痕靈媧顛倒窺乾坤  
攜童手攬西瑤綠省識壺天真面目巾箱揅摺仙馭伏  
羽化之身海一粟趙家石屏古籍傳凝神成象由清堅  
河圖文理疑復然造物狡獪立乎玄似行欲駐似搔首

短轡搖風鞭挂拇草色茸茸滿驢口反掌忽驚仙出走  
傳觀方寸誇天工如月有魄眼有瞳實積深韞錦段籠  
碎石滅影真空空

趙高邑鐵如意歌

并序

鐵質銀章橋腹葵首重二十兩長一尺五寸一  
尺爲身博一寸厚五分五寸爲頸博半寸厚四  
分首畫天驥腹銘兩行曰鉤而無鋌廉而不剝  
以歌以舞以弗若是折惟君子之器也小印文  
曰夢白背有天啟甲子春製六字皆篆書七曜  
五岳云回祀亞之文剝落者半猶辨其畫按甲

子爲天啟四年公觸魏闢怒放歸明年乃削籍  
遣戍此蓋家居時所鑄相傳有十許柄授諸弟  
子意謂遇賊卽擊云近時詩人多詠是題知所  
見非一矣方鐵珊得此以贈范今雨予從而借  
觀焉謂高邑在明屬真定府府志載公恒陽書  
院碑記自述從艾純卿先生讀書於此因得鄉  
舉蓋公發祥之地卽予今所主講者也公魂魄  
有靈度必戀此則以如意歸予庶幾公所式憑  
歟因爲長歌以謝二君並簡諸知好同屬和焉

尺半鐵聲錚錚二百年苔繡生上嵌日月星下圖五岳

形終葵之首天馬精甘有三字摹斯冰鈴以斗檢銘非  
名下元紀歲徵前明乃是高邑趙忠毅公手鑄成嗚呼  
趙公當日不如意勁節稜稜丁亂世論四害拂給事論  
四凶撓大計太阿方倒持魁柄歸婦寺斫地空歌磊落  
才盤胸莫吐乾坤氣再黜再起何能爲斧柯不奈龜山  
龜三君又錮漢鉤黨一身幾化犴牢芝歸來千秋亭鑄  
此太古鐵九州已成錯百鍊不可折黝然一片荆柯心  
鑿以滿腔嵇紹血是時東方未明之硯應在旁吉金壽  
石同堅剛乃欲擊大闢挽頽陽河汾弟子一一分攜將  
登朝莫作剛繞指斯倭如請劍上方豈知櫛杷輩牙爪

森毒鉅坐公十罪萬五千  
賊田園琴鶴盡籍沒此鐵  
母乃躍入滹沱藏雁門關  
外冰雪窟托命唯餘鑱白  
木烈士肝塗東廠刀驅臣  
心斷西臺竹前有魏廣微  
後有牟志夔但容公去不  
容公歸書生皮骨那似鐵  
揮手一映孤魂飛冥冥九  
門朝上帝摘取天棊付天  
吏錦衣碎首羣凶殲纔是  
人間如意事我聞姚萇昔  
遇張惡子袖裏烏金同此  
製呼兵召鬼等遊戲正直  
何如君子器至今幾柄猶  
傳留藝林價重珊瑚鉤元  
英下拜孟博祭擊案起舞  
風颼颼君不見恒山郡公  
故里講舍當年肄經史殘  
碑猶記平江艾舊物合歸  
山長李爲君指揮後進驅



唐草書真言傳 卷五十一  
設邪談忠說孝天飛花趙公英靈來髣髴尺半之鐵高  
於黃金七丈佛

題趙璞函先生授詩遺照爲子範明府作

我讀光祿詩歟隅蠻府驚神奇長言空乞王宰畫絕筆  
遽同狼暉馳我拜光祿像生不並時心空仰虛堂白日  
悲風來烈士鬚眉動秋爽蒼蒼竹樹茫茫山詩境只在  
蒼茫間當時傳家節操託毫素豈料招魂瘴瘴埋衣冠  
金川百戰全軍駭猿鶴沙蟲同瓦解歎息勞臣殉劫灰  
護持遺卷煩真宰若不見丈二及將軍報國肝腦塗人  
陣幾人曾讀書又不見三寸管經生白頭守蠹簡戰馬

一斷筋骨輒惟公生爲詞伯死鬼雄史編文苑祠慰忠  
始知憂患天所福豈有節義詩能窮寫此授詩圖不獨  
傳六義千古忠臣孝子公之志王謝家聲出鳳鸞文章  
生氣留天地祇今去公六十年海內談藝思名賢裏尸  
馬革真無憾濯足龍湫定作仙公有龍湫濯足圖畿南良吏心  
如水鄭重詒謀藏故紙光祿英靈常在此我綴新辭祝  
國殤恍看玉立高歌起

爲湯厚田廣文題其遠祖信國公遺像

廣文官冷鬚眉蒼自言系出東甌王清門世澤尙不泯  
遺像得自元城張龍騰鳳劇三十八赭墨照室森風霜

就中此幅最雄毅神寒骨竦眼有芒生氣逼人不敢視  
英靈倏忽來虛堂淩烟開面未衰老冠佩已換軍中裝  
奇龐福艾喈嘍將脫命鋒鏑留金瘡當年翊運功早著  
揭竿一旅歸滁陽醉來自詡據屋脊輕重漢楚言非狂  
袴侯恭謹虎侯訥臣心白日懸秋光胡藍獄起羣喋血  
幾人臥榻逃斧戕始知達務爲俊傑天以老病全忠良  
雞鳴山廟崇位業並肩曹國班徐常卽如浙東亦尸祝  
五十九城嚴海防生經百戰身壽康沒四百載猶餘慶  
裔孫北游際 盛代不解武略能文章宗支邂逅氣相  
感重摹古影珍縹緗人言祖孫貌必肖果看驥骨侔飛

黃濠南澱北合流派左圖右史揚芬芳題詩梅老溯華

冒徑欲往拜陳椒漿

謂梅廣文成棟

松楸故國不堪問孝陵烟

樹今微茫

### 送人之湘中

不到瀟湘地人間未覺秋帆隨衡嶽轉天入洞庭浮雁影白蘋渚笛聲黃葉樓何當招屈賈一爲畔牢愁

### 過陽朔東孫大令澄

亂山遮曉色客飯尙雞鳴雲氣低連水灘聲響入城春寒農事嬾縣小吏心清卻羨賢孫宰吟餘臥宿醒

### 肇慶道中雨

蓬背陰雲重江風送晚雷亂山衝雨立飛瀑盡烟開春  
到殊鄉老愁隨獨客來篙師投岸泊指點話崧臺

得小鎮安周別駕心如書卻寄

地圖南盡處山過鬼門青獷俗官如贅蠻春瘴有馨月  
黃飛盡活江黑浴蛇腥慎保寒酸骨狂吟酒莫醒

白門

繫纜白門柳秋心歸櫂遲殘花江令宅荒月蔣侯祠人  
醉笙歌夜烏啼風露枝秦淮幽咽水曾見六朝時

王總戎池亭小集

虛閣受波聲涼衣趁晚晴花容偎客醉詩骨抱秋清月

上琴逾靜林深鳥不驚放懷成嘯詠忘在亞夫營

湘夜

荒野無人境歸心一葉舟蛩聲如怨別湘氣自凝秋月  
晚蓬窗落風搖旅夢浮不知夜深淺搯枕獨吟謳

江城晚眺

地負崑崙外秋澄睥睨前江聲夜郎水帆影夕陽烟骨  
肉仍千里兵戈近一年永懷愁極目嵐瘴起蠻天

李少鶴丈自軍營病劇北歸詩以送之

殺賊心猶壯耽詩病易侵骨如長劍瘦愁與大江深舊  
卷留天地微言判古今從游恨我晚悽絕伯牙琴

寄題龍州官閣

太平府同知所治大人以軍功授此  
前曾攝篆雲章侍焉讀書於吟

秋之

舫

海國龍編地籌邊舊有樓遐氓存漢姓別部統蠻州分  
野天南盡朝宗水北流時和仁政簡官閣我曾遊  
尙憶吟秋舫花圍一水明馬人供菜把蛇鬼避書聲小  
瘴桄榔霧寒譙蛤蚧更石關題字處應已綠苔平

送春園公子赴廣州

此夕莫辭酒天涯將送君數聲烟際舫千疊海東雲寶  
玉清時賤江山勝蹟分趨庭有奇句相與慰離羣

送葉巢南

蘭花開幾時又把送君卮別我抑何遽逢君方恨遲烏  
蠻千里擢白髮一囊詩海日亭邊酒狂吟復對誰

明日到昭州

暝色散村渡炊聲聞舵樓片雲山背雨黃葉驛門秋旅  
宿棲無定危程問亦愁篙師耐辛苦明日到昭州

過王秀才峽園居

野色一庭聚幽居如在村種花人載笠放鴨水當門道  
味閒方覺詩心淡不言我來亦無事瀟灑向琴尊

和臯薌學張水部格律

衙退每相訪空齋遲旅眠晚涼新雨後清話一鐙前暫



輟憂民事難忘選勝年於今那再得風月五湖船  
官忙客自閒瀟灑一庭閒生趣砌旁草遠懷牆外山酒  
杯因病減詩句帶愁刪君有文昌筆高吟許共攀

永平道中

翩然馬首東十月向盧龍塞日盤雕影山泥凍虎蹤斷  
厓秋後雪壞壁古時烽閑道榆關近飛雲路幾重

寶店早發

萬室方同夢征輪已半途衣霜秋旅健塔火夜禪孤熟  
路行猶怯殘星看欲無依微城闕影紅日上平蕪

寄葉巢南

別來又見柳珍珍  
漂泊盟鷗賸兩三  
此夕何人歌水調  
一樓春雨夢江南  
年華絲竹心多感  
老病風花酒易酣  
安得扁舟乘興去  
獨攜秋卷訪雲嵐

過一鑑樓呈松圃先生

豪騎酣春正冶游  
獨尋談侶共清幽  
主人詩思澹如水  
繞郭雲山青入樓  
坐處數花飛暮雨  
吟餘雙影對閒鷗  
讀書娛老真多福  
慚愧風塵我黑頭  
先生有句云有書可讀堪娛老與世無求且放閒

招葉巢南山人二酉小酌成詩

莫厭看花酒入唇  
天涯風信又殘春  
年來我爲詩常瘦

局外誰知仕亦貧  
瘴嶺軍書催破賊  
江樓夜雨黯懷人  
期君健筆追琳瑯  
醉草平蠻露布新

九日西樓登高和邱芝房太守

雲山蒼莽入邊秋  
江影松聲抱一樓  
晴景難逢重九日  
詩人恰聚古邕州  
天酬晚節榮黃菊  
酒引閒心向白鷗  
醉把茱萸高處望  
鬱蔥佳氣滿西疇

如亭總戎穆克登布五丈歌席

從容軍令肅蠻疆  
池館蕭閒數舉觴  
前席借籌文士筆  
後庭燒燭美人妝  
歌翻饒吹橫秋管  
酒暈刀瘢說戰場  
醉袒袍花扶客去  
貔貅營外月如霜

飄落時寄居外舅彭新甫先生家

飄落文無遂海萍五雲如夢謫秋星一條冰老藏龍劍  
三匝鳥饑繞雀屏孤榻冷懸今夜雨舊山虛映旅袍青  
王昌被酒吟聲苦人隔紅牆不忍聽

晤王丈若農題近集後

紫藤花下月紛紛今夕添杯喜論文老去折腰陶靖節  
春來傷別杜司勳名場瑀璫誰知我舊卷推敲一感君  
安得壯游湘水曲也操鉛槧逐龍雲

集中多與錢襄山先生倡和詩

揚州

撲面香塵馬足驕滿天明月照紅橋百年生氣梅花嶺

一片怒聲瓜步湖柳外妝樓人鬥酒水邊鐙舫夜吹簫  
祇憐冷落雲山色看過南朝與六朝

閨門弔蓼洲周公

紛紛鉤黨逐風雷  
俊名高是禍胎誰使紀綱歸北寺  
由來鍛鍊擅西臺  
孤墳合與要離接一死  
真同孟博哀  
讀徧十三君子傳  
傷心不獨爲羣才

汜光湖懷古

當年桂檝泛湖光  
鎮國兵符擁武皇  
天上樓船鐃吹合  
鏡中行殿舞衣香  
誰教玉輦親犀甲  
終見珠襦出豹房  
往躅已隨陵谷變  
水雲猶似茂園涼

漢武出獵

豹尾雞翹望屬車金鞭騰踏露霜餘  
曾聞賈誼難爲傳  
猶喜相如敢上書  
汗血馬來西極遠  
髦頭星拱北辰居  
周王猿鶴泰王鼎不及仙桃降碧虛

遊仙

上清何處著  
器塵藥榜銀壇聚列真  
遮道青牛逢尹喜  
入門仙犬吠劉晨  
瑤池悔竊桃如斗  
玉斧難摧桂作薪  
迴首鈎天多雨露  
願持千戚衛句陳

同人小集東沽草堂得潮字

負郭閒庭遠市囂  
泥人天氣近花朝  
野櫺窺客燕來去

斜日入門波動搖詩筆有神逢酒健旅愁如雪向春消  
醉餘誰弄桓伊笛喚起東溟夜半潮

將赴禮部試留別晁堯次見贈原韻

追陪車笠又年年久託龍門客亦賢入室獨窺鴻寶枕  
乘風初上孝廉船才名數去甘王後慧業修成讓謝先  
聽到驅歌重回首滿山春雪馬蹄前

咫尺雲衢此路通提攜情誼感深衷何人入幕能如我  
有母嘗羹祇累公五夜荒雞催舊雨一鞭新柳帶華風

尊前試較當年別紫綬青袍已不同

謂乙丑夏  
都門之別

寄汪二能肅

昨出正定赴楚

破帽疲驢過太行  
楚雲如夢去蒼蒼  
身行萬里渾忘倦  
胸有千秋不諱狂  
廉吏子孫多索寞  
騷人詞賦易悲涼  
相思欲問南飛雁  
潭水桃花意短長

次韻答沈匏廬太守過訪見投之作卽以贈別

請纓誰繫單于頸  
撫劍空揚壯士眉  
戎馬關山頻跋涉  
雲龍韜孟且追隨  
鏐寒暮雨僧分榻  
草綠荒城客訪碑  
惆悵使車留不得  
碧紗籠處對芳蕤

寄桂林舊友羅星橋呂荔帷諸君

萍蹤南北海天分  
回首杉湖遠似雲  
昨夜涼風吹夢去  
芙蓉花底一逢君



愛說相思怕別離  
相思河畔柳如絲  
三年重讀離筵句  
又是青燈暮雨時

射虎新編塞下歌  
又驅羸馬飲滹沱  
天涯苦說還鄉好  
一種春愁酒債多

殷勤芳訊領頭梅  
淡墨題封驛使催  
料得茅堂書到日  
滿天風露桂花開

爲今雨題徐又淑畫蘭

吾友徐藥生太史女也名莊歸胡氏歿遺一女

墨氣猶含瘴雨腥  
錦函珍重惜娉婷  
而翁空解吟芳草

澤畔無人問獨醒

藥生罷官猶羈桂林

關情詞客舊于雨  
薄命美人嬌似花  
紙上香魂招不起

春風誰護小蘭芽

國朝詩傳

卷五十七

完

國朝詩傳卷五十七終

國朝畿輔詩傳卷五十八

長洲陶

樸鳧薌輯

錢塘吳長卿更生校

方履錢

履錢字彥聞一字木民大興人嘉慶二十三年

舉人官福建閩縣知縣有萬善花室詩集四卷

方駿謨先府君行述府君七齡卽穎異讀書每  
百行一二過輒成誦戊寅恩科鄉試中

式座主俱深器府君謂學術自兩漢出非尋常  
經生家言癸未遊中州康蘭皋中丞紹鏞僑居

河內之清化鎮延府君課其子姪而劉松嵐觀  
察大親同客其地往來尤數時河內袁蘭村明

府通聘修縣志明府爲簡齋太史子文望軼時  
流與府君交莫逆河內志舊無金石一門府君

借吳山子先生育補之乙酉主武陟王明府榮  
陞署修武陟縣志丙戌大挑一等分發福建

以知縣用戊子赴閩時福建議修通志大府知  
府君熟于其學命擬定設局章程及采訪體例  
府君條上章程八體例三十有六大府善之署  
永定縣知縣邑有胡鳳兆者豪於鄉與族人某  
不相能殺其子劫其父棺棄深山中積數年官  
弗能捕府君爲書論之反覆數百言遣胥徒一  
人持往鳳兆見所論書泣且說知罪不可逃願  
歸死遂論如法南鄉民許開王殺族姪振昌逃  
不獲府君怒旣而禱于神開王芒芒然歸徑入  
城至縣署踰閤門吏有識者執之一訊而服庚  
寅修邑志時通志已開局檄郡縣采訪諸事實  
所頒條例卽府君手定本也府君謂永定志久  
弗修宜重輯乃延邑人商榷而手自屬稿志成  
人服其精覈調署閩縣閩縣爲會城首劇最號  
難治尙幹冠嶼宏嶼諸鄉俗橫悍小有睚眦卽  
持械互鬪府君集鄉老族正諸人戒諭之剖析  
利害甚懇至鄉民咸頌首敬聽有泣者閩俗婦  
欲殉夫死者或卹率糾錢爲臺於四達之衢婦  
盛服祭夫辭別其尊嫜乃登臺自縊戚鄰持香  
送之觀者如堵時南臺有某氏婦將築臺縊府

君偵知之卽呼其舅姑父兄來諭之曰烈婦殉  
夫乃至情至性不容自遏聖人猶以爲過中今  
築臺而要之是驅之死也不俊者坐以法婦戚  
泣再拜去越一日乘人不及備卒縊于房論者  
謂此婦均死然死得其正非府君之克致風教  
不及此自後亦無敢築臺觀縊者十月奉檄兼  
監通志局與纂修諸君斟酌盡善城內外河渠  
久淤請於大府分投開濬日往監勘勾稽土方  
不辭勞勩自抵閩清釐積案凡五百有奇會久  
不雨米價騰踊府君心憂之隨大府禱于山  
凡數日得疾卒年四十有二府君至性過人喜  
交遊以友朋爲性命尤服膺張皋文惠言李申  
耆兆洛兩太史於學無不究購書萬卷皆手自  
丹黃經史有異同必集諸書反覆互證求是乃  
已工駢體文論者謂滙漢魏以降諸作者之精  
神而陽開陰闔不名一家詩古體宗六朝近體  
則出入于大厯十子與陸祁生明府繼輅相切  
磨詩益進尤喜爲長短句善隸書於近時獨推  
服鄧皖白石如酷嗜金石文字見有摹拓善本  
必重直購之先後所積幾及萬種多王氏金石

孝編孫氏寰宇訪碑錄所未載者游伊闕時居  
山中匝月徧搜石刻得唐以前造像題名多至  
八百餘種或謂府君造像題名大抵鄉曲愚夫  
婦所爲無關學問君得毋嗜癖府君曰六朝民  
罹鋒鏑苦或釋氏說思種福田以求生全其情  
可憫觀之可以識世變且題名中有名人游歷  
所至者考其年月可以證史傳異同豈無關學  
問乎所著有萬善花室駢體文集六卷續集一  
卷詩集五卷詞集二卷河內縣志三十卷武陟  
縣志三十卷永定縣志二十卷皆已刊其未刊  
者有富蘅齋碑目六卷伊闕訪碑  
錄三卷希姓錄一卷泉譜一卷

陸我嵩序君學本六經沿洄於先秦兩漢扶樹  
風骨含咀英華發而爲詩磅礴在中鬱紆在外  
皆忠愛排側之所流露信乎如萬斛泉觸地  
而出隨其形之大小聲之疾徐靡不中節  
紅豆樹館詩話末民世爲順天人僑居常州入  
多推其駢體文然嘗與吳山子育菟羅金石與  
張宛鄰琦討論詞學與劉燕庭喜海攷覈泉幣  
其他天文地理氏族源流六書九章之法者闡

梵筌之書皆旁通博涉則君於學固無所不究也詩淵源兩漢纂組六朝爲其結體極高故古色斑璘迴殊凡響

### 送晉卿出都

逢君三載初周遲語未歡交君三月餘輾轉忘飢餐饑肌貴如玉吐語珍如蘭金石志摩冷風雨箴團樂團樂豈朝夕胡爲心含酸今日喟有和明日徒長歎

鳴蟬淒以清崇岡蔭朝旭征夫一回首四牡夫何速晨辭太行坂夕就桑乾宿明德濯丹纓清流不盈掬烈風振層霄卿雲吐光燿願爲比翼鳥離鳴互追逐奮飛何所望顧此情自篤南土早不涼九月多新菊采之不我



遺千里知芬馥

送管大孝逸南歸卽寄懷董子誥楊劭起

寒月缺未落游子戒曉征途長束鞍急裝冷驅車輕我  
欲久相從裹糧不得行送君上西門一語淚已傾周原  
多衰草厯亂圍山程山光隱鋒鏑川瀆呼癸庚

天子聖且哲黎庶忘太平嗟彼不逞徒潛嘯潢池兵機  
槍夜半起刁斗三更鳴狐狸蹟在苒臬獍影縱橫初奔  
長垣疆繼竄滑水城赫然王師怒麾蘭上將旌再捷慰  
宵旰一月羈連營殄除當有期銛刃歸太清絃歌虞舜  
世市野無所爭年饑罷催科法律寬且明仁心薄寰海

德惠達句萌何爲竊萑蒲自甘割與烹燎火雖將撲傷  
此田間氓有室不可居有犁不可耕提攜去鄉井哭泣  
求藜藿爲時固未遠朝暮難爲情敢問誰驅之狂寇如  
長鯨敢問誰安之繪圖欲有呈廷中稷卨契此事勞公  
卿庶颺豈無暇治安豈無名我今爲此言苦與君牽縈  
役夫畏往路車鐸猶琤琤車前走荒兔車後隨饑僮朝  
見戎馬衣暮聞鞀鼓聲君行二千里魂夢使我驚昨日  
來嚴飈凜凜飛霰霰手龜難展曲齒關聞瑯鏗我友董  
與楊策騎風相迎體無狐貉裘急寒何所更愁思不成  
寐擁被憐孤檠君復辭我去彌覺百慮營霜露滿故園

君歸冬日晴期與二三子懷抱竹箭貞砥礪良材重斲  
削貴藝成勤惟探奧術謙乃保素誠如彼連城姿拂拭  
光愈瑩繫此純直志母爲世網撓蒙陋思所尙遙望如  
蓬瀛恹恹寄旅人咄咄勞吾生勿忘北雁書有客在幽  
并

同人譙張宛鄰丈於憩園次夕復飲此

夙軫謝知音羈懷媚幽谷未知昨景遷迭使游蹤續棲  
鳥讖歌新空徑聞屐熟月從海上來光豔勝秉燭睥往  
卽難追晷移何太促幸有沽酒人與之期信宿美人撫  
寒柯攬袖淚盈掬不惜尺寸心豈徒絃凡囑

贈閻吉人

華纓念往遇抗袖要新知遨遊京薊間結言良有時之  
子蘊清猷拂塵與我期逸潮登瓊岫寒瑛沈珠帷意親  
拙所語心賞久忘疲眷眷風中琴泠泠絃上詩朋交再  
爲奏非君誰能遲秋蘭比素飢北風多遠思

行至富莊驛夜坐懷劉青園

征車遲不行驟行良非已云待故人來相期渺秋水翹  
首空日夕振鞭遽至此明晨隔山岳歧路所從始三載  
飢渴懷何由慰之子遠尊有溼衣近燭無乾蕊鐸夢墮  
黃埃寒蛩催夜起題詩淚盈壁君來請君視

傷歌行

展君卷中詩多爲行役詞聞君揮素琴但成別鶴音舊  
時識君貌光彩遙相照今日晤君顏愁思寡所歡牽君  
雙羅襦暗塵沒絲絢束君錦盤帶新痕減垂綸攬袖撫  
君肌骨疎形已萎解冠握君髮蓬葆青絲闕豈無雕俎  
陳入口忘甘醇豈無蘭英酌臨觴不能勺豈無青鳳裘  
何以慰綢繆豈無明月璫何以釋煩傷春入雁門塞獨  
織寒雲背青楊不挽絲落花誰結佩秋泛五湖南悒悒  
無所甘零露濡我裳閨風脫我驂朝欲涉大河無梁起  
衝波暮欲登太行巉業不可量去此但盈尺茫洋安所

適猛虎悅人膚封豕虺人魄虺蜴巧取食射工善伺客  
君子慎厥行胡爲事長征轉蓬古所歎旅念易吞聲清  
蛸在故樹螻蛄期初衍人壽非金石乃與荆漢爭緬彼  
采芝侶冥心忘六字沆瀣漱瓊漿椒庭鋤赤斧日中期  
不來搔首起延佇精識性命理退安茅茨步豈能違芳  
願久逐回飈舞朝槿亦何心漚根萎新土

偕唐荳君游獨秀峯不得登最高頂

杖策偕良儔城寰訪絕壁如登金馬門悅揖蓬壺客高  
冠燦陸離莎徑孕紺碧摩穹氣三五拔地形咫尺削下  
肆嵯峨函中見標格躋險穿螺髻攀危御鼈脊層關封

苔齒烟巒樹重柵俯窺玲瓏影倒峙巔崢嶸  
旣隙語笑驚天風扶持探水脈羣情或怨峻  
同懷各耽癖不乏乘雲梯恐蹈鑿山厄

病起日食山藥百合各賦一詩以美之

山藥

玉延資服食最貴外州種三載客茲鄉喜踏田間隴  
紫藤雜花秀翠葉牽苗茸秋初已登盤玉臂人爭捧  
翳子起殘瘡病隔猶煩涌石鼎煮雲根未食神先動  
微甘齒頰沁潤色瓊瑤重休論黃金壽且卻丹田尤  
太行多靈藥泉石清香擁何時隨野老小刷擔筠籠

百合

百合產嵩嶽大如爛銀盤朋儕憐我困投顓誘加餐溫  
磨輔心氣軟潔調枯肝幾如都波入朝夕陳瓢簞我觀  
蒙齋語言此羣蚓蟠蒙齋筆談云余居山中如蚯蚓變百合往往見之異哉出  
汗壤修美凝霜圃化理焉可識重附珍百鏹故園三雨  
株花發青琅玕誰言止涕淚南望秋風罩本草經云百合食之止淚

送季嫺妹于歸

南國有嘉稻叢生隴畝間析根各移植厥實乃始繁托  
體爲弟弟骨脈相牽援內外雖有殊恩誼終無偏女子  
既已長一旦施衿罄遣行入他姓同生若棄捐成人固



應爾能無摧肺肝矧翳吾與汝手足何憊單兄妹各一人  
少小承歡顏送子將于歸神淒涕淚潛痛念我慈父  
昔日俱愛憐我母秉義方育子勤且艱吾長汝最稚相  
差逾十年中間弟及妹幼弱遭摧殘惜哉汝次兄學成  
身力辱中殤棄其室魂魄居岱巔六人只存二護汝如  
芝蘭提攜兼誨誘相愛無間言汝生多淑德質端不在  
妍敏慧愛詩書請益日幾番性情伉以直辭語訥且嫻  
我父宰允吾汝生已在官繼復刺粵西萬里隨征鞍嗟  
子求微名京兆秋風搏定省違晨昏賴汝勤加餐六年  
始得舉馳歸霜隔天我父不及待棄我歸重泉悲苦欲

追殉猶恨身體頑汝能侍父疾送父憑素棺宛轉慰慈  
母辛咽不忍宣以此兩相較百倍勝我賢我父爲廉吏  
身後無薄田我從墨纒中舌耕裏青鹽遠游越五歲負  
米思江壩母衰仗汝侍欲去猶遷延有別長依依有淚  
同漣漣汝能識我意百事使我安愛嫂若事姊親悅若  
比肩偕之奉母養俾母忘憂煎嗟嗟家多故擇壻良獨  
難汝筭又數春我慮愁如癰今年策明良我若星離躔  
身言甘就試幸厠令長班致此胡足喜祿仕如抱關所  
欣天闕下爲汝得伯鸞巽巽天水君皎皎青琅玕吐  
言金玉屑走筆龍蛇蟠卅年困蹶足守進天所慳一朝

凌風翔鄉賦振羽翰計偕當仲春先後來幽燕夙契感

離思乍合生憂端共傷倦游久悵彼幃居鰥比部二曹

郎

謂趙樹三郎中蘇韻莊主事

戚友情相褻爲通兩家好願作朱陳

歡間名未十日獻賦登金鑾我喜幾欲狂遠過身高齋

問其何以故遂忘食與眠念予少兄弟愛汝使之然但

惜桂苑才試以烹小鮮臨廷仰

帝簡作宰匡廬

邊乞假得歸娶人羨錦衣還請期旣納采卽詠桃夭篇

清門殊世俗繁費皆可刪奩資一何薄安得瓊瑛盤裁

作四時衣采繡亦爛斑珠絲懸絡索雙鬟垂螺環約髮

珉珣簪綴以翡翠鈿纈帶紫羅襦玉結黃金釵瑱瑱飾

衆日不足十萬錢布多雜絲少篋而陳細紉時嗟慈母  
意欲語眉先攢愛女思豐盈憐子方貧寒我今亦何爲  
終日起長歎先人祇一女隨兄久迤邐茲當吉禮成心  
力敢不殫尺帛一囊粟卽日甘分頒籌思無可贈贈汝  
三尺箋箋中書韻語滴淚和墨研汝身雖強力汝體多  
勞瘠冷燠小有妨喘嗽輒糾纏嗣今須護攝勿使日削  
腹喜陽怒乃陰損益氣所干順時遣鬱悒遇物謝忿悁  
不逮事舅姑既往莫可攀歲時奉家祭粢盛重潔蠲將  
事必以誠親手濯豆籩持家此爲首凡百敬愼先夫子  
如良朋愛結今生緣和順久愈諧謙畏斯無愆剛則濟

以柔狹乃規以寬有無俱黽勉得失無欺謾撫視前室  
女曲意使安便人生凡所遇安得期萬全人或忤我意  
坦悅相周旋境或小不適檢躬惟益虔汝爲宰官婦切  
戒奢與專奢爲天所忌專爲人所姍外政期勿聞閭閻  
若有闢耀首辭珠璣飫口樂瓢簞鋌火夜愔愔束帛朝  
裘裘古人重循吏其室無佩環異物不足貴清明乃共  
傳積衣千萬袂暖身惟一棉陳簋方丈滿飽腹惟一饌  
貪侈亦何需徒爲招禍繩子孫貴讀書富足易輕儇幼  
齒乘高車長大爲執鞭皆由貽以患置抄使疾顛概茲  
皆當懷毋爲俗慮牽汝豈叢尤悔吾情過拘攣申申爲

此語日省庶勵旃奴婢務矜卹勿令生煩冤尤宜教以  
正事上靜以顓好惡無偏向乃克泯其姦孤悻務憫念  
分惠及杯棬尤宜將以敬慎勿邀譽焉好譽諂乃進虛  
壑何能填言一漏者萬聊爲明拳拳詞願意則深可如  
金石鐫補汝德未足勗汝意未堅取言貴切近女誠擬  
重編至若母家內恩憶芽沈緜母年雖七旬舊患幸已  
痊康樂享期頤福祐期明嫡汝嫂性雖愚孝敬能乾乾  
諸姪習佔畢質分堪陶甄吾將官闈越界通江右山他  
時謀省覲筍輶來歸遄汝心頗足慰宜禁淚潺湲望汝  
光兩門儀行昭蘋蘩秋氣正淑清香發庭桂丹鏘鏘八

鸞駕吉慶賀團樂此詩勿再誦誦者增悲酸藏之琉璃匣真氣芬旃檀

楊忠愍公空谷流泉琴歌

朱絃乍拂松風鳴素絲夜泛清商聲枯桐壽世三百載先生手澤天人驚君不見在山泉清出山濁壯氣泠泠滿空谷雜耳淫哇未易除雅操蒼涼一何促先生忠誼貫金石餘蘊兼能達音律精思夢謁虞帝廷親受重華五音節正樂原宜先正君廟堂時事方紛紜青詞獨煽冰山勢白簡能酬玉闕恩一疏將軍誤再疏丞相怒柳鎖風吹徹骨香剛腸百鍊金難鑄我觀先生論製樂選

竹調絲自鐫削首和葭管次和琴絳以頌虎谷以箴此  
琴疑卽手所裁銘文小篆書雷回蚪枝蟠跗色堅潤綠  
髹瑤軫生冰埃端襟試鼓流泉意蒨呂鐘宮皆入細激  
越同驚變徵音紺雲紫雪凝天地摩挲漆字悄三歎自  
古龍門傷直幹至人欲寫猗蘭操浩氣空存廣陵散姓  
字今如星斗光偉哉人琴兩不亡袖籠湘水浸寒月虛  
籟空山印碧血

除夕懷趙樹珊比部

十年賣賦黃金臺足塞途遠空歸來祇今淪落龜州外  
歲暮荒江聽寒瀨此詩誰最憶吾憶趙秋曹孤桐百尺



枝獨立燕山高秋曹名達家苦貧秋曹官冷行益醇我  
交於君久更親不獨相許心與身異時曾客春明路宜  
武坊南舍舍在朔風瑟縮子衣單夜寒入直郎官署早  
歸不問生計窮握手快論傾深衷餓死寧甘棄溝壑高  
歌但覺來春風解衣質酒筭已竭作文貰米手欲脫忽  
驚歲晚宿逋多門前剝啄聲何急君言勿愁且痛飲飲  
醉橫眠股相枕白眼何妨對市曹青符尚可支官廩長  
安富人厭酒狂走往乞錢須氣揚季布一言重然諾相  
如滿座生輝光朱提三百擲堂下我輩論才豈無價愛  
向夷門訪狗屠猶能射館求鵝炙紛紛逋侶笑不前餘

事聊爲灌夫罵大呼高陽舊酒徒不須重過黃公壚烹  
羊割豕樂歲除今夕不樂復何如當時意氣凌霄漢論  
交不惜公卿換感君款結歲月深使我淹留春事半驂  
亭楊柳花如雪送我征車夕陽岸易水少年心慘悽汝  
南鳴雞知夜旦轉蓬萬里浮雲翔拔劍擊柱意淩亂今  
年今夕惟寥落舊事追思尙如昨踟躕北望空搔首對  
酒清歌不能作吁嗟人生獨少稱意時我不思君當誰  
思美人嬋娟隔天闕令我鬱鬱絨絨恨銷膚肌

融縣黨籍碑歌爲顏丹泉學珠大令作

宇宙忠佞不一徹勢若背道紛交馳時事愈變降愈下

醜正罔直情益私惟宋大觀執國柄蔡氏作相尤傾危  
老成屏逐若敝屣善政毀棄如漏卮削秩遠竄快心意  
更欲萬世同詆欺加以朋黨罪莫大一網遂可無子遺  
大書臣京時死上羅列惡黨銘之碑磨礪深鑄二百輩  
始駭駭怒識者嘖孰知佞筆泐名位榮若袞袞珍鼎彝  
逾數十載石盡毀翻恐賢者不見思共求碣本布天下  
名山精室藏其辭從官沈公有賢裔述職朝奉居南陲  
自矜厥祖烈忠黨還石重泐融水涓靈祇代守魑魅懼  
雄峙蛟國驚蒼螭金函玉簡同寶惜精氣上達斗與箕  
溫公蘇公最昭著日星朗朗人皆知餘者歲遠或恐晦

得此炳耀千秋期令聞轉若有默相京術雖按功不貲  
融州大尹顏夫子曲阜華胄吾先師出宰劇邑樂未解  
訪古獨往窮山陂首拓此碑揭廣座今古照耀光陸離  
別檢佳木惠同嗜沆瀣盥手始敢披快觀姓氏動心魄  
字字若鏤人膚肌我行萬里試京兆此碑枕篋常自隨  
不朽之業名乃重無愧科目當若斯題名石刻亦頗富  
長安雁塔何其卑先生取贈意有在珍分義利師前規

送支子翔鳳翔出都

秋陰三日寒威徧落葉蕭疎隔輕霰支君別我去江淮  
清淚凝沙掩君面少年走馬凌燕雲爭說名花滿芳甸

千里心交似雨稀  
一生詩骨無人見  
肝膽文章百不宜  
散雪搏沙何所戀  
嗟君飄泊天東南  
子亦蒼涼賦游倦  
但識羈棲勝奔走  
失侶哀鳴不如雁  
雙轂盤盤激石湍  
扁舟破浪催銀箭  
倘憐燕市十丈塵  
爲翦吳淞百尺練  
申誓示以壽陽所得  
晉泰始甄製硯拓本  
數十種爲作甄硯歌

月暈搏霄日胎炙  
八公山下土花赤  
誰見昆明舊劫灰  
黑雲一丈露精魄  
玉盤金魚古閼宮  
淮王雞犬鳴雲中  
火沙盪擊千餘載  
合受神丹換骨功  
壽陽名吏謫仙子  
手按圖經續班史  
點點落香科斗盤  
蒼蒼玉骨蛟螭死

摩挲殘碣出花甌剝蝕猶書晉泰始泰始之年探寶符  
壽春重鎮東南隅同槽二馬方吞魏折臂三公欲沼吳  
銘功或亦例今石琳宇雕垣建奇蹟甌尾留題督將名  
篆文怒勃生光澤良材作硯徑如環拓石疑將硯譜刪  
碧雨乍沾鸚鵡眼紫痕猶暈鷓鴣斑君不見阿房并土  
未央瓦甌鼎紛紛布天下奇質蒼涼古廢墟一逢真賞  
心能寫我亦沈埋沙礫人願隨此硯受陶甌倘鐫寶墨  
堂中品能學淮商擇隱文

酬黃文山

太行山南鬱雲樹作客欣逢黃叔度一襟新翠溼燕塵

躍馬來從竹深處共依東閣日相親握手知君道誼真  
袖中奇句戛金石十日不出猶逡巡見子覆瓿多殘稿  
漫謂元文當世少昨朝霖雨掩重帷持贈長篇氣雄顚  
君年四十頭先禿我更幽憂甘蟄伏此生契濶復何求  
難得天涯慰芳躅請君北望青泥坂多少鹽車困驥足  
共覓山陽舊酒壚脫簪散髮隨狂徒時聞庾老南樓展  
何必山公啟事書

小忽雷歌爲劉吉甫農部作

斲琴首貴龍門桐古音古調難爲工蜀川良材顯唐代  
忽雷大小藏深宮促柱哀絃感人聽裂帛新聲傳短柄

誰持妙技獻文宗內府中丞云姓鄭繁華轉轂記當年  
其器其人俱謫仙飄流再入彤廷藉嗚咽重調碧玉鈿  
鼎湖一去銅臺散從此塵寰不復見忽聞千載躍延津  
金石精光如紫電東塘先生什襲藏長歌麗句推山蕚  
遂令曲部雙絃木收入詞壇古錦囊煦息烟雲幾易主  
世間爭寫檀槽譜諸城公子偶得之獨與鼎彝詫奇古  
我從燕市昔曾觀象軸螭衣觸手寒小字旁鐫臣混進  
紀年猶署建中元建中之元國多故天寶宜春委霜露  
何事韓公供奇巧繁音不惜君心誤馬上琵琶塞草秋  
城頭感栗陣雲浮東鄜未授崑崙調南內先聞白鵲愁



興奴攏撚曹綱撥雅藝貞元最渾脫餘事偏傳小忽雷  
鵝絃夜洗長安月伶元遺恨復誰知想見紅紋按指時  
曲項玲瓏新畫本綠腰淒冷舊冰絲君家海上烟縹緲  
休捧逍遙歌得寶一條冷玉夏清商夜深驚起驪龍爪  
銅鼓歌爲趙芸西孝廉作

蠻獠奔突如駭鹿飛首雕題滿川谷砰訇一聲震四野  
爭聽鼓聲集鼓下獠人鑄此爲雄渠千牛不敵青蟾蜍  
雷回花篆無文字精奇不辨何時製我聞伏波南征矜  
始得鎔鼓鑄作銅馬式乃知此器出自秦漢間珍異已  
在東京前大者文淵小諸葛盛名強附皆僞言日南太

守越裴少溪洞居然不愛寶

歐北先生守鎮安時得一鼓以歸

草堂世

守有文孫徧示同人徵靡藻霜鐘遠動酒未傾蠻金夏  
似鯨魚鳴恍傳跼跼飛鷲曲都作鏘鏘鐵騎聲銅鼓灘  
中曾擊楫惆悵當年鬱林石陌頭饗舞幾春秋我獨摩  
挲三歎息

### 湘江道中

萬古難消意人生別恨多請看湘水上帝女怨如何竹  
響瑤琴夢山空寶瑟歌積愁本無限此地易滂沱

### 南寧期蔡大拙齋行增不至作此留寄

桂林相送處葦夢暗經秋每聽瀧濤合疑君汎小舟江

山沈別恨風雨隔新愁落葉哀猿夜烟波極望收

留別丁二仲喬

結帶感殊鄉征帆又夕陽詩歌中酒意身手少年場  
梅雨留人早蘭雲入夢香始知今桂海別有古河梁  
荔浦同舟約經春燕不歸孤蓬豈吾願別淚滿君衣  
愛日盟心密餐霞世侶稀相期雲漢外明德慰調餓

晚秋游大明湖

濟南名士國城北酒人湖水氣浮殘芰秋聲上短蘆  
魚梁斜照隔雉堞遠山孤初至深相得閒鷗識我無

酬劉松嵐先生見贈

海內瞻耆宿林泉久養真  
新詩兼藻律晚節絕風塵  
弟子調編磬奚童理釣綸  
居然太行側能款謫仙人  
郊居遲夙願羈旅託東陽  
客思征鴻路秋風射犬鄉  
情諳水竹蔬味得山薑  
乘興來何日亭西桂漸香

仲秋望後三日同人集飲寓齋悼懷馮子學山

列宿詞壇氣若雲少年屈指更空羣  
老何西北郎官賦大庾東南國士文  
但許緘愁分弱弟每緣感舊覓諸君  
玉壺對月狂呼起江上梧桐綠未分

昔年勝侶憶賓鴻持燭何由覓敬通  
尺五羈魂悲去鶴一雙風貌泣寒蛩  
酒非白障澆難醉人到黃泉想亦窮

蕭瑟爭知塵夢久故交都在冷秋中

贈方通甫

去日鄴臺解帶新南來爲我慰勞薪潯陽自古多遷客  
潞浦於今有故人侯霸升堂先謁友胡威受絹爲留賓  
江州雅郡歌名德公子詩篇滿後塵

屈大夫祠

湘天生死誤騷人天問何如問水濱七國論才須帶楚  
三閭積怨竟亡秦薛蘿山鬼依名士杜若雲旗享逐臣  
來謁清祠逢競渡野風吹散一江蘋

馬伏波祠

鳥蠻灘上伏波祠落日靈風捲畫旗  
犵鳥銜花開臘社奇鯨鯢石拜江  
離神棲水國消戈甲客渡征帆聽鼓  
聲猶憶武溪深一曲秋濤嗚咽有餘悲

蒼梧道中懷唐大茝君

祿養今聞五斗難更無枳棘可棲驚  
詞人溫尉才都減羈客唐衢淚不乾  
盡室天涯成債帥名卿世業問園官  
別來春雨殘花裏獨醉應憐革帶寬

泊潛港

浪直帆平去已遲望中雲樹隱鳩茲  
身如斷雁輕關吏心羨鰥魚覓網師  
春杪烟波歸客渡江邊蹤蹟落潮知

此間十里湖陰月更有何人弔可兒

邵蘭風廣銓游山左得疾甚劇馳返都下尙未痊  
也悲其蕭索詩以慰之

客中猶得捧吟肩酒病江湖已十年二豎氣驚三舍避  
五車書抱一絲縣真長東道工稱藥張翰南歸願執鞭  
莫爲浮名留錮疾石芝丹乳事精研

行至趙北見小竹壁間題句卽用其韻寄懷翰風  
曾容小竹諸君

鐸夢分明度遠沙燕雲離緒正無涯塞鴻已去難爲客  
尊酒初寒苦憶家游子遠隨天外櫂故人好泛日邊艖

此行欲寄南征賦三十潘郎鬢已華

移居覃懷書院

滕囊今又寄修椽一枕青山臥晚烟但有屋梁書可著  
偶無琴軫意難傳客來長與浮盃斝門外何妨接市廛  
除卻豬肝累安邑此心與夢兩蕭然

游濟源龍潭寺

五畝招提境絕幽三年蠟屐喜頻游石幢曉露微含潤  
竹徑春泉尚伏流難向枯僧參偈語獨尋殘碣過荒邱  
依稀四令祠邊樹猶帶清陰護碧秋

題秋山行旅圖



國朝畿輔詩傳

卷五十八

七

笠屐穿雲入畫圖  
幽泉石磴影同紆  
馬蹄紅葉濃于染  
鴉背斜陽澹欲無  
村社初開椰子釀  
山僧歸報柿林租  
不知得得行何速  
多少秋人憶膾鱸

四十自壽

奇氣狂名世早喧  
自持靈府守籬樊  
化蟬甘食殘編字  
牂馬愁牽下澤轅  
試吏較先崔子玉  
習經誠愧魏陽元  
鏡中華髮猶難惜  
生計何能問故園

初求祿養解荷衣  
敢說風塵與願違  
到眼方知多苦瘡  
此心原不慕輕肥  
山城竹葉金尊滿  
官閣梅花玉屑霏  
差喜東坡生日近  
新詞珍重鶴南飛

寄懷劉青園

杜若依人醉青渠隔座香不知東國酒誰泛北園觴恨  
寫芙蓉紫懷緘橘柚黃幾回招素羽聞道東瑤裝去歷  
驚三峽飛魚下九湘詩難浮桂渚夢解覓桃榔夕夕橫  
牛斗年年事角張月來紗幌瘦雲浣茜衫涼此際鴻泥  
印前身鳳吹長遙憐故山侶何處暮秋坊臥短殘砧急  
吟孤小簟荒庭闌歡帶履官札滿縑緙睡起雙珎影愁  
中七寶箱狄聲丹岫迴魚尾翠流颺近問箋多淚新痕  
鬢有霜銘心如匣劍千里合寒芒

賈傅祠

太傅祠前路奇芬染碧苔客愁湘楚外年少洛陽來初  
接靈風爽深墜壯志摧萬言中導窾三代上論才自受  
吳公薦將求漢道恢樂蠟蒼令補禮恨叔孫裁掉尾簪  
封建平心議阜財主臣期豈運宇宙望重開俎豆銷芒  
刃詩書救劫灰文皇徒守讓帝佐在程材已雜黃肅學  
何煩絳灌猜官疎金闕遠身棄玉山頽一見知難決孤  
忠未忍回過秦龍已蟄弔屈鳩爲媒墮馬憐無狀傷麟  
劇可哀長沙饒瘴癘下土困蓬萊辨鬼驚宣室招魂豔  
夜臺經綸鑄鼉董詞賦孕鄒枚合傳靈均在殊薨宋王  
陪始終成一哭生死竟同坏門繡連雲草旗翻落日槐

癰神應汗漫末俗更遲回鵬賦吟離口鯁生淚滿顙  
從季主卜聊欲免塵埃

江上紀程

金沙夜鼓表忠碑皖口城南余闕祠碧血種成階下樹  
鐵柯含怒不含悲

明波瑟瑟恨如環曉泊江州正閉關萬頃碧烟飛入夢  
不知滿眼是廬山

司馬遺亭蹟尙存不逢商婦亦消魂蘋花江曲三更露  
絕似青衫舊淚痕

落日晴湖似早霜黃陵廟下泊輕航門前三十六灣水

開到白蓮秋正長

越西舟行竹枝詞

相思江上放船遲  
沙淺灘平知未知  
一道盤渦直如箭  
芙蓉花盡送郎時

代縫蓑簑趁朝陰  
順縷裁絲苦費鍼  
江上隄防多暗雨  
飛來郎處溼郎心

左江右江水並頭  
三江直下不能留  
人心未必長如水  
愿盡回瀾總合流

買茶客舫去潯南  
憑寄浮梁書一函  
桂露糖霜三十器  
但同辛苦不同甘

水到蒼梧分外驕中流日日見停橈  
儂心不隔東西嶺  
只要端州有便潮

螺螄巖下梵王宮片石灘心礙短蓬  
偷得兒家新樣簪  
海山螺黛畫屏風

楊際運

際運字士會號小厓涿州人饒子嘉慶二十三  
年舉人官河南羅山縣知縣有碧山草堂詩集

田家

天寒屏鉏犁歲晚築場圃野老茅檐下負暄相對語鄰  
雞上屋鳴樹影正亭午年豐有餘資黍稷盈倉庾日夕

炊烟生晚飯呼兒女

縣官名未識少長村墟中但願歲常稔子孫世爲農窮  
冬風物淒夜坐圍鑪紅盤殮具雞黍斗酒邀鄰翁今年  
倍收秫不愁饔飧空

同俞竹侯晚步荷池

出門秋滿衣落日蟬吟歇幽人悄無事散步踏明月明  
月不在地菰蒲影飄瞥循行緣曲池池水引周折荷花  
含露氣窈窕媚詩骨夜涼香四聞塵襟滌煩熱對此淡  
忘言超然得禪悅

醵飲寓園花下

流鶯啼過清明天客懷落寞思閑眠年年春事太無賴  
長是花開風雨顛今年無風亦無雨桃嬌杏媚爭春妍  
海棠兩本色欲絕舉簾一笑何嫣然羣芳無言恰有意  
似與詩客相招延分曹促席來酣醪畫叉各下青銅錢  
野筍萋羹玉脂滑河魚斫膾銀絲鮮園蔬脆美已堪摘  
偶爾餽餽開芳筵漫寄閒情賭棋局遡飛逸興聯詩篇  
花光倒浸入杯底酒波吸動紅淪漣夕陽西下客未散  
浩歌一曲芳尊前對花有酒莫辭醉明月飄零春可憐

### 思歸

忽忽春過半羈情感歲華有身常作客無夢不還家活



計悲焚鳥勞生笑戰蝸何時稅塵鞅歸種邵平瓜

晚行

幾載還塵務歸途心意閒夕陽鴉外樹秋色馬頭山野  
稻黃千頃溪菱綠一灣村家風物好暫此豁心顏

秋夜述懷

久作京華客西風宋玉愁吟懷憐獨夜病骨覺先秋宿  
鵲移枝警寒蟬拂草流忽驚芳歲晚歸計欲淹留

村行

好是田家四月餘蒲芽短短柳疎疎一羣水鳥忽飛散  
遺葉滿溪人打魚

潘一桂

一桂字薌林南皮人嘉慶二十四年舉人

遷安道中

風景思安喜人來石柱西海天看日近山路踏雲祗舊  
驛連沙漠征鴻記爪泥前程塵盛少茆店徧新題

王枚

枚字仲實號香初天津人道光元年舉人官山

東諸城縣知縣

津門詩鈔香初閒靜  
善言論詩清婉有致

山中夜行

征車伊軋遠聞聲石徑盤紆載燧行目斷寒星深樹暝  
心驚野火半山明避人狐兔衝林過拔地岡巒傍馬生  
村犬吠人知驛近數家鐙火已巖更

郭紹鏞

紹鏞字儷咸號竹逸任邱人道光元年舉人

荒齋

荒齋剛十笏疎爽早秋時風冷竹先覺蝶輕花不知蒼  
痕侵坐榻蟲語和新詩小倦拋書臥悠然一解頤

魏亨培

亨培字竺鄉昌黎人道光元年舉人

寄興

蕭然衡泌任棲遲才不才間位置宜世事真如蛇豕足  
虛名敢說豹留皮但令悔過同周處定許逢人說項斯  
肝膽向誰誇脫穎空囊賸有兩錢錐

陳祺齡

祺齡字蓮浦獻縣人道光五年拔貢生官順天府訓導有劍花龕詩影一卷

紅豆樹館詩話蓮浦爲余及門士天才警敏滿  
灑不羈詩學溫李纏綿幽豔間闕長吉之室嗜  
酒醉則悲歌慷慨四座盡驚喜填小詞書畫篆  
刻俱工秀絕倫以通才沈滯冷官非其志也年  
未四十病酒一夕卒劉覽  
遺集不勝毀壁摧柯之痛

雲屏

雲屏隔夢秋蟾冷琉璃光瀉紅牆影露溼瓊花渺渺香  
銀蠟絲弱芳難整雁柱勻排想翠絃錦囊斜抱又經年  
懷中碧玉暖生未何人淚滴紅珠圓舊時條脫殷勤護  
芙蓉密字藏縑素白玉花開絳節歸彤雲遠挂相思樹  
香入清簫頰暈融低鬟欲咽含桃紅仙夢分明記仙語  
軟塵下視何朦朧

巫山高

巫山高陽臺曉紅心小結相思草暮暮復朝朝數徧珍  
珠少雨重簾六扇窗金蟲深護頰梨釭乃開雲笈酌月

聚夢避紅塵同不睡坐聽雙玉敲懸瑤不曳藕絲帶欲  
試凌波步消瘦合相憐五銖衣怯芙蓉露瓊葉分蛾含  
意橫波丁香空結隴禽奈何香蘭解笑人依約思靈語  
飛瓊小字肯教呼吟魂癡入江天雨難得梔子花繡將  
綬帶斜願乘雙飛鸞翩然拂青霞珊瑚鞭響兩龍起浴  
絲催上青油車回頭淚拭春冰冷可憐立盡湘雲影留  
恨人天共渺茫月華滿樹啼烏哽

閒情

涼影落庭樹飄然夜氣浮露濃疑作雨花嫩不禁秋吹  
笛誰家月懷人何處樓閒情正無限河漢已西流

對菊

五柳先生去黃花無故人孤標甘冷落佳色辱風塵我  
亦未離俗君當不厭貧淡然相對處慨想萬天民

初春閨况

不聞東風信頽然一枕橫病多疎酒伴閒極悟茶聲芳  
草幾時綠小樓連日晴春愁預相避低壓舊簾旌

城南

城南門巷昔曾經紅倚桃花竹更青響屨廊開期月到  
移春檻好悵雲停銀瓶玉虎心同轉石鼓桐魚氣不靈  
慚愧瑤臺舊相識尙招飛夢度仙扃

雨夜書懷

雨雨風風夜寂寥  
小樓冷坐可憐宵  
難尋詩夢虛吟榻  
不負鐙情仗酒瓢  
幽怨何深移蟋蟀  
芳心未展泣芭蕉  
清寒已足供惆悵  
又是誰家玉笛飄

春陰

擬向花神奏綠章  
莫教風雨殫春光  
癡情空自吟芳草  
酣夢誰能喚海棠  
半榻雲香禁酒病  
一簾風影滅詩狂  
遙憐蝶會無消息  
幾日紅閨倦曉妝

七夕感懷

蓮更若爲此宵長  
天上人間思渺茫  
月榭誰家低翠鈿



雲軒有路度紅牆初飛烏鵲波應淺欲采芙蓉露正涼  
六扇畫屏全不掩曝衣樓上看銀潢

西南月畫一痕秋冷接微雲片影浮絳節未來知悵望  
銖衣同曳願遲留寄情錦字經時隔賞聘金錢甚日酬  
便是仙家猶惜別塵寰爭不使人愁

不向天孫乞鳳梭盈盈方寸起星河病中禁得秋如許  
花外分來淚更多綺戶鉤簾懷月扇玉璫緘札盼雲羅  
滿庭風露饒情絕涼透輕衫奈怨何

一片風懷轉自憐橫塘望斷水如烟玉笙譜恨天將曉  
銀燭搖情客未眠留枕奇絲疑郭翰乘槎舊事記張騫

心期約畧雙星解碧落紅塵共悄然

秋夜懷遠

別日飛花點綠苔青鸞消息至今猜  
獨開虛幌和愁倚不下湘簾待夢來  
慧性何當明似月吟身偏是瘦於梅  
可堪離恨隨時積秋滿窗前落葉堆

劍花龕感興

話到前遊一惘然夢回三十六重天  
酒空吟盡惟存藥詩滿羞囊不問錢  
無可奈何翻得悟未能免俗也隨緣  
同龕賸有芙蓉劍冷枕霜花且熟眠

此人

九片茫茫著此人隨緣悟卻去來因  
必求夢好應難睡但得心閒亦任貧  
死後定成羅漢果生前或是女兒身  
情場佛海都何處廿六年華祇負春

自題畫蘭

卸卻銀泥裙月墮秋烟冷江皋不見人  
立盡湘雲影

納涼

中宵何處發青芬夢覺香凝帳底雲  
花影橫斜風露冷  
一簾青露碧氤氳

無言覓句倚黃昏風透簾櫳落月痕  
偶向菱荷池畔立  
好收花氣入詩魂

碧空如洗夜將殘斜月隨人共倚闌還傍小樓攜玉笛  
一聲吹破綠雲寒

曉起

曉起秋光冷碧梧夜來風雨記模糊小庭一徑花敲倒  
獨向蒼苔手自扶

春日雜詩

素琴嬾向綺窗彈同病文君亦可憐漫倚春風看鬢影  
藥烟愁嫋綠雲邊

曉寒無力著衣裳亂疊重衾壓象牀借問誰家春正好  
早開明鏡試晨妝

多情燕子若憐儂舊夢依稀話晚風惆悵雲軒悞消息  
海棠開到十分紅

譜成金縷惜華年回首流光去似烟二十六回春過也  
幾多愁寄有情天

水仙花

紛紛桃李凍難醒獨抱春寒倚畫屏江上峯青人未遠  
一痕香裏夢湘靈

無言獨對小窗陰隔水盈盈寄素心便欲淩波載花去  
移情一奏海天琴

國朝織補詩傳卷五十八

終